

दिनांक 24.06.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- प्रधानमंत्री नरेन्द्र मोदी कह्यो—ऑपरेशन सिंदूर रे दौरान फौज देश मांय बण्या असलाह रे पाण दुश्मन ने गोडा टेकण माथे मजबूर कीना।
- लोकसभा अध्यक्ष ओम बिरला प्राक्कलन समितियां ने लोकतंत्र री पहरेदार बतायी।
- मुख्यमंत्री भजनलाल शर्मा कह्यो—वंचित तबका रा लोगां री जिन्दगी मांय बदलाव बगैर प्रगति अधूरी—प्रदेशभर मांय अंत्योदय संबल पखवाड़ो सुरू व्ह्यो।
- प्रदेश रा 28 जिलां मांय आज बिरखा रा आसार— 5 जिलां मांय भारी अर 23 जिलां मांय मझला दर्जा री बिरखा रो अनुमान।

प्रधानमंत्री नरेन्द्र मोदी नारायण गुरु अर महात्मा गांधी बीचे व्ह्या ऐतिहासिक संवाद रा सौ साल पूरा व्हेवण रे मौके नई दिल्ली मांय राखी ज्या जळसा मांय ऑपरेशन सिंदूर रो जिक्र कीनो। वे कह्यो के भारत रक्षा हलका मांय तेजी ऊं खुद रे पाण ऊबो व्हे रह्यो है। प्रधानमंत्री कह्यो के ऑपरेशन सिंदूर रे दौरान फौज भारत मांय बण्या असलाह रे पाण दुश्मन ने गोडा टेकण माथे मजबूर कर दीनो। शताब्दी समारोह मांय श्री मोदी कह्यो के देश री हिफाजत ऊं जुड़्या फैसला अब देश रा भला रा मुद्दां ने ध्यान राख र लिया जावे है।

लोकसभा अध्यक्ष ओम बिरला कह्यो है के लोकतंत्र री आत्मा वां री संस्थावां री साफगोई, जिम्मेदारी अर सहभागिता मांय व्हे है अर प्राक्कलन समितियां इण री पहरेदार है। श्री बिरला मुंबई मांय व्ह्या संसद, राज्यां अर केन्द्र रा राज वाळा प्रदेशां रा विधान मंडलां री प्राक्कलन समितियां रा राष्ट्रीय सम्मेलन रा समापन सत्र मांय बोल रह्या हा। वे कह्यो के संसदीय समितियां सरकार रा पूरक री भूमिका निभावे है। लोकसभा अध्यक्ष ई राष्ट्रीय सम्मेलन ने माली अनुशासन अर संस्थागत तालमेल सारु खास बतायो।

मुख्यमंत्री भजनलाल शर्मा कह्यो है के समाज रा आखिरी सिरा माथे बैट्या लोगां ताई शासन री मदद पूगावणो ही अंत्योदय है। वे पंडित दीनदयाल उपाध्याय अन्त्योदय सम्बल पखवाड़ा री सुरुआत रे मौके आज जयपुर जिला रा बिचून मांय राखी ज्या राज्य स्तर रा जळसा मांय बोल रह्या हा। श्री शर्मा कह्यो के वंचित तबका री जिन्दगी मांय बदलाव आवण ताई देश री बरकत अधूरी मानी जावेला। मुख्यमंत्री कह्यो के 9 जुलाई ताई चालण वाळा ई पखवाड़ा रे मार्फत जरूरतमंद लोगां री मदद करी जावेला अर सुबीतां ऊं महरूम लोगां ने मुख्यधारा मांय लावण री कोशिश करी जावेला।

पूरा राज्य मांय आज सुरू व्ह्या ई पखवाड़ा रा तैत सगळी ग्राम पंचायतां मांय राजीना शिविर लगा र जरूरतमंद लोगां ने फायदो दियो जावेला।

पखवाड़ा री सरुआत रे मौके आज अजमेर, डीग अर बालोतरा समेत न्यारी-न्यारी ठोड़ां लोगां ने जमीं रा स्वामित्व कार्ड दिया ज्या। झुंझुनूं, भरतपुर, बारां अर डूंगरपुर समेत केई जिलां री ग्राम पंचायतां मांय समस्या समाधान शिविर लगायी ज्या।

परवन वृहद् सिंचाई परियोजना रा तैत डूब हलका मांय आवण वाळा झालावाड़ अर बारां जिलां रा 27 गांवां रा बच्चोड़ा मकानां सारु मुआवजो दियो जावेला। आं मांय झालावाड़ जिला री खानपुर अर अकलेरा तहसीलां रा 17 अर बारां जिला री छीपाबड़ौद तहसील रा 10 गांव भेळा है। ई सारु कोई 37 करोड़ रुपया मंजूर करी ज्या है। जल संसाधन मंत्री सुरेश सिंह रावत बतायो के ई रा असर वाळा पिरवारां ने बेगो ई मुआवजो दियो जावेला। आं रा 1 हजार 90 मकानां सारु मुआवजो दियो जावेला। परियोजना रा तैत पेली ई आं जिलां रा 47 गांवां री डूब हलका मांय आयी जमीं अर 29 गांवां रा थोड़ा-घणा अर पूरा डूब प्रभावित मकानां सारु अनुदान दियो जा रह्यो है। हालांकि चारागाह, सिवायचक अर वन भूमि माथे बण्या मकानां रो मुआवजो नी दियो जावेला। जल संसाधन मंत्री आज किशनगढ़ कने बांदरसिंदरी मांय माधव सरोवर ने और बेहतर बणावण रा कामां रो जायजो लीनो। वे अहलकारां ने सगळा काम आवतो महीनो पूरा व्हेवण ताई खत्म करण रा हुकम दीना।

सहकारिता राज्य मंत्री गौतम कुमार दक सहकारी समितियां मांय ऑडिट अर आमसभा री कार्यवाही टेमसर पूरी करावण माथे जोर दीनो है। वे आज जयपुर मांय राख्यी ज्यी समीक्षा बैठक मांय बोल रह्या हा। दक अहलकारां ने अभियान चला र खाद-बीज री गुणवत्ता री जांच करण अर महकमा मांय निगरानी तंत्र दुरुस्त करण रा हुकम दीना। दक 1 ऊं 7 अक्टूबर बीचे समितियां ऊं आमसभा राखण बाबत् कह्यो। वे **सहकार से समृद्धि** रा तैत कर्या जा रह्या नुवा कामां मांय तेजी लावण बाबत् ई कह्यो।

प्रदेश मांय व्हे रही चौमासा री बिरखा बीचे मौसम विभाग आज 5 जिलां मांय भारी अर 23 जिलां मांय मझला दर्जा री बिरखा व्हेवण रा आसार जताया है। ई बीचे बारां जिला रा मांगरोल मांय सब ऊं बत्तो 18 सेंटीमीटर पाणी बरस्यो। लगातार व्हे रही बिरखा रे कारण शाहबाद अर किशनगंज समेत केई ठोड़ां खास गेलां ऊं कट गयी है, जद के केई ठोड़ां पाणी भर्योड़ो है। अलवर, करौली, दौसा, कोटा, टोंक, चूरू, बीकानेर अर हनुमानगढ़ मांय ई चोखा मेह रा समाचार है। राजधानी जयपुर मांय ई तेज बिरखा पाछे जाम अर पाणी भरण रा हालात बण ग्या। भीलवाड़ा, कोटा अर भरतपुर मांय बिरखा रा समाचार है। सवाईमाधोपुर जिला मांय ई चोखो मेह बरस रह्यो है। म्हाणा खबरनवीस बतायो के इण ऊं तळावां अर बंधां मांय पाणी आवण लाग्यो है।

देश मांय आपातकाल लागू व्हेवण रा 50 साल पूरा व्हेवण रे मौके काल संविधान हत्या दिवस मनायो जावेला। आपातकाल ने जनता ने परेशान करण रा दौर रा तौर ऊं याद कर्यो जावे है। ई सागे ई ओ दिन लोकतांत्रिक अर संवैधानिक मूल्यां रे प्रति नुवी प्रतिबद्धता रो दरसाव करण रो मौको ई है। 50वीं वर्षगांठ रे कारण संविधान हत्या दिवस ऊं जुड़्या कार्यक्रम आखा साल चालेला। आं रा तैत प्रदर्शनी, संगोष्ठी, नुक्कड़ नाटक अर मशाल यात्रावां रा कार्यक्रम राखण सागे लोकतंत्र सेनानियां रो मान कर्यो जावेला। पाली जिला रा ज्ञानचंद वैष्णव संविधान हत्या दिवस रे मौके मान करण सारु सरकार रो आभार जतायो।

बावड़ियां सारु ओळखाण राखण वाळी ऐतिहासिक नगरी बूंदी रो आज 784वों स्थापना है। ई मौके पारम्परिक संस्कृति अर आब-ओ-हवा ने बचावण रो संदेश देता थकां न्यारा-न्यारा आयोजन राख्यी ज्या। जिला कलेक्टर अक्षय गोदारा बतायो के जिला प्रशासन अर पर्यटन विभाग री ओर ऊं राख्यी ज्या जळसा मांय लोग बढ़-चढ़ र भागीदारी कीनी। स्थापना दिवस रे मौके स्मारकां मांय आमजन ने मुफ्त दाखिल व्हेवण दिया ज्या। **पौधे**

લગાઓ-બૂંદી સજાઓ થીમ માથે ન્યારી-ન્યારી ઠોઢાં છાયાદાર અર ઔષધીય ગુણાં વા઱ા પૌધા લગાયી જ્યા । રાજકીય સંગ્રહાલય સુખમહલ માંય ચિત્રકલા અર ફોટો પ્રદર્શની રાખ્યી જ્યી અર લોક કલાકાર રંગારંગ પેશ કીના ।

.....